

筆記小說大觀

集

宋吳曾纂
能改齋漫錄

第八冊

進步書
局校印

龍溪先生全集

卷之六

忠貞堂

能改齋漫錄卷十六

樂府上

宋 臨川吳曾虎臣纂

黃魯直詞謂之著腔詩

晁無咎評本朝樂章不具諸集。今載於此云。世言柳耆卿曲俗。非也。如八聲甘州云。漸霜風淒緊。閨河冷落。殘照當樓。此真唐人語。不減高處矣。歐陽永叔浣溪沙云。堤上遊人逐畫船。拍堤春水四垂天。綠楊樓外出秋千。要皆絕妙。然只一出字。自是後人道不到處。蘇東坡詞。人謂多不諧音律。然居士辭。橫放傑出。自是曲子中縛不住者。黃魯直間作小詞。固高妙。然不是當行家語。自是著腔子唱好詩。晏元獻不蹈襲語。而風調閑雅。如舞低楊柳樓心月。歌盡桃花扇底風。知此人不任三家村也。張子野與柳耆卿齊名。而時以子野不及耆卿。然子野韻高。是耆卿所乏處。近世以來。作者皆不及秦少游。如斜陽外。寒鴉萬點。流水遶孤村。雖不識字人。亦知天生好言語。

聶冠卿多麗新詞

翰林學士聶冠卿。嘗于李良定公席上賦多麗詞云。想人生美景良辰堪惜。問其間

賞心樂事就中難。是并得。況東城鳳臺沙苑。泛晴波。淺照金碧露洗華桐。烟霏絲柳。綠陰搖曳。蕩春一色。畫堂迴玉簪瓊佩。高會盡辭客。清歡久。重燃絳蠟。別就瑤席。有翩若驚鴻體態。暮為行雨標格。逞朱脣。緩歌妖麗。似聽流鶯亂花隔。慢舞縈回。嬌鬟低。鞦腰肢纖細。困無力。忍分散。彩雲歸後。何處更尋覓。休辭醉。明月好花。莫漫輕擲。蔡君謨時知泉州。寄定公書云。新傳多麗詞。述宴遊之娛。使病夫舉首增歎耳。又近者有客至自京師。言諸公春日多會於天伯園池。因念昔遊。輒形篇詠。緣渠春水走潺湲。畫閣峰巒映碧鮮。酒令已行金盞側。樂聲初認翠裙圓。清遊盛事傳都下。多麗新詞到海邊。曾是尊前沈醉客。天涯迴首重依然。

山谷愛賀方回青玉案之詞

自賀方回為青玉案詞。山谷尤愛之。故作小詩以紀其事。及謫宜州。山谷兄元明和以送之云。千峰百嶂宜州路。天黯淡。知人去。曉別吾家黃叔度。弟兄華髮。遠山修水。異日同歸處。長亭飲散尊疊暮。別語纏綿不成句。已斷離腸能幾許。水村山郭。夜闌無寐。聽盡空階雨。山谷和云。煙中一線來時路。極目送幽人去。第四陽關雲不度。山胡聲轉。子規言語。正是人愁處。別恨朝朝連暮暮。憶我當年醉時句。渡水穿雲心已

許晚年光景。小軒南浦。簾捲西山雨。洪覺範亦當和云。綠槐煙柳長亭路。恨取次分
離去。日永如年愁難度。高城回首。暮雲遮盡。目斷人何處。解鞍旅舍天將暮。暗憶丁
寧千萬句。一寸危腸情幾許。薄衾孤枕。夢回人靜。微曉瀟瀟雨。

世推重少游醉卧古藤之句

秦少游既為千秋歲詞。人尤稱之。秦既沒藤州。晁無咎嘗和其韻以弔之云。江頭苑
外。當記同朝退。飛騎軋鳴珂。碎齊歌雲遶扇。趙舞風回帶。嚴鼓斷。杯盤藉草猶相對。
洒涕誰能會。醉卧藤陰蓋。人已去。詞空在。兔園高會悄。虎觀英遊改。重感慨。驚濤自
捲珠沉海。詞中云。醉卧藤陰蓋。少游臨終作詞。所謂醉卧古藤陰下。了不知南北故
无咎用之。山谷守當塗日。郭功父嘗寓焉。一日過山谷論文。山谷傳少游千秋歲詞。
歎其句意之善。欲和之。而海字難押。功父連舉數海字。若孔北海之類。山谷頗厭。而
未有以卻之者。次日又過山谷問焉。山谷答曰。昨晚偶得一海字韻。功父問其所以。
山谷云。羞殺人也。爺娘海。自是功父不復論文於山谷矣。蓋山谷用俚語以却之也。
賜名魚遊春水

政和中。一中貴人使越州回。得詞於古碑陰。無名無譜。亦不知何人作也。錄以進御。

命大晟府填腔。因詞中語。賜名魚遊春水。云秦樓東。風裏燕子還來尋舊壘。餘寒猶峭。紅日薄。侵羅綺。嫩草才抽碧玉茵。媚柳輕窵黃金蕊。鶯轉上林。魚遊春水。幾曲攔干遍倚。又是一番新桃李。佳人應怪歸遲。梅裝淚洗。鳳簫聲絕。沈孤雁。目斷清波無雙鯉。雲山萬重。寸心千里。

漢殿夜涼吹玉笙

仙女侍。董雙成。漢殿夜涼吹玉笙。曲終却從仙官去。萬戶千門惟月明。河漢女。玉練顏。雲輶往往在人間。九霄有路去無跡。裊裊香風生珮環。李太白詞。也有得於石刻而無其腔。劉無言自倚其聲歌之音極清雅。東臯雜錄。又以為范德孺謫均州。偶遊武當山。石室極深處。有題此曲於崖上。未知孰是。

送春送君有無盡意

王逐客送鮑浩然遊浙東。作長短句云。水是眼波橫。山是眉峯聚。欲問行人去那邊。眉眼盈盈處。才始送春歸。又送君歸去。若到江邊赶上春。千萬和春住。韓子蒼在海陵送葛卿斷章云。今日一杯愁送春。明日一杯愁送君。君應萬里隨春去。若到桃源問歸路。詩詞意同。

晁无咎嘲田氏詞

元豐己未。廖明畧。晁无咎。同登科。明畧所遊田氏者。麗姝也。一日明畧邀无咎晨過田氏。田氏遽起對鑑理髮。且盼且語。草草粧掠。以與客對。无咎以明畧故。有意而莫傳也。因為下水船一闕云。上客驪駒繫。驚喚銀瓶睡。起困倚粧臺。盈盈正解羅髻。鳳釵墜。繚繞金盤玉指。巫山一段雲。委半窺鏡。向我橫秋水。斜領花枝交鏡裏。淡拂鉛華。怱怱自整羅綺。斂眉翠。雖有惜惜密意。空作江邊解佩。

水光山色漁父家風

徐師川云。張志和漁父詞云。西塞山前白鷺飛。桃花流水鰕魚肥。青箬笠。綠蓑衣。斜風細雨不須歸。顧況漁父詞。新婦磯邊月明。女兒浦口潮平。沙頭鷺宿魚驚。東坡云。元真語極清麗。恨其曲度不傳。加數語。以浣溪沙歌之云。西塞山前白鷺飛。散花洲外片帆微。桃花流水鰕魚肥。自花一身青蒨笠。相隨到處綠蓑衣。斜風細雨不須歸。山谷見之。擊節稱賞。且云。惜乎散花與桃花字重疊。又漁舟少有使帆者。乃取張顧二詞合而為浣溪沙云。新婦磯邊眉黛愁。女兒浦口眼波秋。鷺魚錯認月沉鉤。青箬笠前無限事。綠蓑衣底一時休。斜風細雨轉船頭。東坡云。魯直此詞。新清婉麗。

其最得意處以山光水色替却玉肌花貌真得漁父家風也然才出新婦磯便入女兒浦此漁父無乃太瀾浪乎山谷晚年亦悔前作之未工因表弟李如麓言漁父詞以鷓鴣天歌之甚協律恨語少聲多耳以憲宗畫像求玄真子文章及玄真之兄松筠勸歸之意足前後數句云西塞山前白鷺飛桃花流水鰕魚肥朝廷尚覓玄真子何處而今更有詩青箬笠綠簑衣斜風細雨不須歸人間欲避風波險一日風波十二時東坡笑曰魯直乃欲平地起風波耶徐師川乃作浣溪沙鷓鴣天各二闕蓋因坡谷異同而作云西塞山前白鷺飛桃花流水鰕魚肥一波才動一波隨黃帽豈知青箬笠羊裘何似綠簑衣斜風細雨不須歸新婦磯邊秋月明女兒浦口晚潮平沙頭鷺宿戲魚驚青箬笠前明此事綠簑衣裏度平生斜風細雨小舟輕西塞山前白鷺飛桃花流水鰕魚肥朝廷若覓玄真子恒在長江理釣絲青箬笠綠簑衣斜風細雨不須歸浮雲萬里煙波客惟有滄浪孺子知七澤三湘翠草連洞庭江漢水如天朝廷若覓玄真子不在雲邊即酒邊明月棹夕陽船鱸魚恰似鏡中懸絲綸釣餌都收却八字山前聽雨眠

今世樂府傳沁園春詞按後漢書竇憲女弟立為皇后憲恃宮掖聲勢遂以縣直請奪沁水公主園然則沁水園者公主之園也故唐人類用之崔湜長寧公主東莊侍宴詩云沁園東郭外襄駕一遊盤李適長寧公主東莊侍宴詩云平陽館外有仙家沁水園中好物華世傳呂洞賓沁園春詞所謂九返還丹者乃知唐之中世已有此音矣

別易會難

顏氏家訓別易會難古人所重江南餞送下泣言離北間風俗不屑此岐路言離歡笑分首李後主長短句蓋用此耳故云別時容易見時難又云別易會難無可奈然顏說又本文選陸士衡答賈謐詩云分索則易攜手實難

千里傷行客

晏元獻早入政府迨出鎮皆近畿名藩未嘗遠去王室自南都移陳離席官奴有歌千里傷行客之詞公怒曰予平生守官未嘗去王畿五百里是何千里傷行客耶

館客棄密約之好

開封富民楊氏子館客頗豪俊有女未笄竊慕之遂有偷香之說密約登第結姻既

過省。乃棄所好。屢約相會。杳不可得。登第後。密遣人諭女曰。若遂成婚好。則先姦後娶。在法當離。必不能久。爾或落髮。則我亦不娶。朝夕遊處。庶能長久。女信之。然思慕已成疾。遂懇請於父母。求祝髮焉。或告客於某氏。結婚者。女聞之。悶絕良久。索筆書曰。黃葉無風自落。彩雲不雨空歸。就歸字落筆。放手而絕。兩句乃舊詞也。

傷春怨

王江寧元豐間。嘗得樂章兩闕於夢中。云。雨打江南樹。一夜花開無數。綠葉漸成陰。下有遊人歸路。與君相逢處。不道春將暮。把酒祝東風。且莫恁匆匆去。其二云。春又老。南陌酒香梅小。徧地落花渾不掃。夢回情意悄。紅箋寄與添煩惱。細寫相思多少。最後幾行書字小。淚痕都揜了。右調生查子。謁金門。

載將離恨過江南

東坡長短句云。無情汴水自東流。只載一船離恨向西州。張文潛用其意。以為詩云。亭亭畫舸繫春潭。只待行人酒半酣。不管烟波與風雨。載將離恨過江南。王平甫嘗愛而誦之。彼不知其出於東坡也。

玉環朝槿

鄭毅夫樂章。有玉環妾意無渝。問君心朝槿何如。玉環韋臯事朝槿。王僧孺詩語也。王賦上山采蘼蕪云。出戶望蘭薰。褰簾正逢君。斂容才一訪。新人詎可聞。新人含笑近。故人含淚飲。妾意在寒松。君心逐朝槿。

蘇瓊善詞

姑蘇官妓姓蘇名瓊。行第九。蔡元長道過蘇。太守召飲。元長聞瓊之能詞。命即席為之。乞韻以九字。詞云。韓愈文章蓋世。謝安情性風流。良辰美景在西樓。敢勸一卮芳酒。記得南宮高擢。弟兄爭占鰲頭。金爐玉殿瑞香浮。高占甲科第九。蓋元長奏名第九也。

玉瓏璫詞

近時有士人。不欲書名嘗於錢塘江漲橋。為狹邪之遊。作樂府名玉瓏璫云。城南路。橋南路。玉鈎簾捲香橫霧。新相識。舊相識。淺顰低拍。嫩紅輕碧。惜惜惜。劉郎去。阮郎任。為雲為雨。朝還暮。心相憶。空相憶。露荷心性。柳花蹤跡。得得得。其後朝廷復收河南。士人者陷而不返。其友。不欲書名作詩寄之。且附以龍涎香。詩云。江漲橋邊花發時。故人曾共着征衣。請君莫唱橋南曲。花已飄零人不歸。士人在河南得詩。酬之云。認得吳家

心字香。玉牕春夢紫羅囊。餘薰未散人何許。洗破征衣更斷腸。

此花開後更無花

李和文公作詠菊望漢月詞。一時稱美云。黃菊一叢臨砌。顆顆露珠粧綴。獨教冷落向秋天。恨東君不曾留意。雕欄新雨霽。綠蘚上。亂鋪金蕊。此花開後更無花。願愛惜莫同桃李。時公鎮澶淵。寄劉子儀書云。澶淵營妓有一二擅喉轉之技者。唯以此花開後更無花為酒鄉之資耳。不是花中惟愛菊。此花開後更無花。乃元微之詩。和文用之耳。

明月逐人來詞

樂府有明月逐人來詞。李太師撰譜。李持正製詞云。星河明淡。春來深淺。紅蓮正滿。城開遍。禁街行樂。暗塵香拂面。皓月隨人近。遠天半鰲山。光動鳳樓兩觀。東風靜。珠簾不捲。玉輦待歸雲。外聞絃管。認得宮花影轉。東坡曰。好個皓月隨人近。遠持正又作人月圓令。尤膾炙人口云。小桃枝上春風早。初試薄羅衣。年年樂事。華燈競處。人月圓時。禁街簫鼓。寒輕夜永。纖手重攬。更闌人散。千門笑語。聲在簾幃。近時以為小王都尉作。非也。

花蓋夫人詞

偽蜀主孟昶徐匡璋納女於昶拜貴妃別號花蓋夫人意花不足擬其色似花蓋輕也又升號慧妃以之為號言其性也王師下蜀太祖聞其名命別護送途中作詞自解云初離蜀道心將碎離恨綿綿春日如年馬上時時聞杜鵑三千宮女皆花貌妾最嬋娟此去朝天只恐君王寵愛偏陳無已以夫人姓費誤也

幼卿浪淘沙詞

宣和間有題於陝府驛壁者云幼卿少與表兄同硯席雅有文字之好未笄兄欲締姻父母以兄未祿難其請遂適武弁明年兄登甲科職教洮房而良人統兵陝右相與邂逅於此兄鞭馬畧不相顧豈前憾未平耶因作浪淘沙以寄情云目送楚雲空前事無踪漫留遺恨鎖眉峯自是荷花開較晚孤負東風客館歎飄蓬聚散匆匆揚鞭那忍驟花驄望斷斜陽人不見滿袖啼紅

並蒂芙蓉詞

政和癸巳大晟樂成嘉瑞既至蔡元長以晁端禮次膺薦於徽宗詔乘驛赴闕次膺至都會禁中嘉蓮生分苞合趺復出天造人意有不能形容者次膺效樂府體屬詞以

進名並帶芙蓉。上覽之稱善。除大晟府協律郎。不克受而卒。其詞云。太液波澄。向鑑中照影。芙蓉並蒂。千柄綠荷深。並丹臉爭媚。天心眷臨聖日。殿宇分明敞。嘉瑞弄香。噢。蕊願君王壽與南山齊。比池邊。屢回翠輦。擁羣仙醉賞。憑欄凝思。夢綠攬飛瓊。共波上遊戲。西風又看露下。更結雙雙新蓮子。闌裝競美。問死。央向誰留意。

東坡卜筮子詞

東坡先生謫居黃州。作卜筮子云。缺月掛疎桐。漏斷人初靜。時見幽人獨往來。縹緲孤鴻影。驚起却回頭。有恨無人省。揀盡寒枝不肯栖。寂寞沙汀冷。其屬意蓋為王氏女子也。讀者不能解。張右史文潛繼貶黃州。訪潘邠老。嘗得其詳。題詩以誌之云。空江月明魚龍眠。月中孤鴻影翩翩。有人清吟立江邊。萬中藜杖眼窺天。夜冷月墜幽蟲泣。鴻影翹沙衣露濕。仙人來詩作步虛。玉皇飲之碧琳瑯。

柳三變詞

仁宗留意儒雅。務本向道。深斥浮艷虛華之文。初進士柳三變。好為淫冶謳歌之曲。傳播四方。嘗有鶴冲天詞云。忍把浮名換了淺斟低唱。及臨軒放榜。時人語之曰。且去淺斟低唱。何要浮名。景祐元年。方及第。後改名永。方得磨勘轉官。其鶴冲天詞云。

黃金榜上。偶失龍頭望。明代暫遺賢。如何向。未遂風雲便。爭不恣狂蕩。何須論得喪。才子詞人。自是白衣卿相。煙花巷陌。依約丹青幃幃。幸有意中人。堪尋訪。且恁偎紅翠。風流事。平生暢。青春多一餉。忍把浮名。換了淺斟低唱。

用江上數峯青之句以填詞

唐錢起湘靈鼓瑟詩末句。曲終人不見。江上數峯青。秦少游嘗用以填詞云。千里瀟湘。授藍浦。蘭橈昔日曾經。月高風定。露華清。微波澄不動。冷浸一天星。獨倚危檣情悄悄。遙聞妃瑟泠泠。新聲含盡古今情。曲終人不見。江上數峯青。滕子京亦嘗在巴陵以前句填詞云。河水連天天連水。秋來分外澄清。君山自是小蓬瀛。氣蒸雲夢澤。波撼岳陽城。帝子有靈能鼓瑟。淒然依舊傷情。微聞蘭芷動芳馨。曲終人不見。江上數峯青。

浣溪沙點絳脣詞

黃季岑云。往年蔡洲瓜陂鋪有用篋刀刻青泥壁為浣溪沙詞云。碎剪香羅裛淚痕。鷓鴣聲斷不堪聞。馬嘶人去近黃昏。整整斜斜楊柳陌。疎疎密密杏花村。一番風月更銷魂。豐城南禪寺壁間有秋社點絳脣云。燕子依依。曉來總為誰歸去。淡雲生處已

覺賓鴻度淺笑深頰便向機中素乘鸞女瑣窗瓊宇會有明年暑

汪彥章詞

汪彥章在翰苑屢致言者嘗作點絳脣云永夜厭厭畫簷低月山銜斗起來搔首梅影橫窗瘦好箇霜天開却傳杯手君知否曉鴉啼後歸夢濃於酒或問曰歸夢濃於酒何以在曉鴉啼後公曰無奈這一隊畜生聒噪何

樂府塵土黃詞

殿中侍御史劉公次莊中豐元祐中罷官寄居臨江軍之新淦嘗往來袁州時有一倡為郡官所據太守怒之逐出境外中豐感其事而作樂府塵土黃並譯箋凡三章其序曰崔徽霍玉愛愛等事昔日歌之非特為二三子而作也然遣語敘情雖為詩曲而叅比樂府則失古遠矣故自唐以來杜甫則壯麗結約如龍驤虎伏容止有威李白則飄揚振激如浮雲轉石勢不可遏李賀則摘裂險絕務為難及曾無一點塵嬰之張籍則平易優游足有雅思而氣骨差弱世異才殊體制之變亦其勢也余比感宜春事作塵土黃一首雖不足方駕漢魏而討本探源或庶幾焉既又為之譯為之箋其義類雖同至於淺深遠近要自以意考之耳其詞曰翠眉連娟舞袖長春風

自對理容粧染絲繡作雙兒。欲飛不飛在羅裳。耳中明月珠。肘後錦香囊。憑高欲
有寄。所寄在遠方。追風還君立路傍。豈不有地能相當。請著一鞭塵土黃。譯曰。妾本
倡家子。笄鬟擅容止。名隸倡籍中。生倡即憎死。物勢本從權。恩情亦遂遷。一朝官長
怒。獨抱錦衾眠。日夕倚高樓。青絲繫白馬。豈不謝殷勤。湍湍淚盈把。萬感自有因。無
容遽相親。請君促金勒。妾願看飛塵。箋曰。春臺女兒似紅玉。曾奉當筵柘枝曲。舞成
早自得知名。更傍春風情不足。客携黃金欲有贈。多在鄰家賭雙陸。近從新官作顏
面。祇得低心隨所欲。自知久去非所安。夜半東門車特碌。秀闕芙蓉潭畔起。每向波
間得雙鯉。水流却上天應難。惟有孤懷似潭水。一騎翩翩錦臂鞵。紅羅百丈作纏頭。
為言聞得琵琶怨。當門下馬欲登樓。莫登樓。君馬駿無限。朱簾薰好香。城北城南無
一瞬。

東坡送潘邠老赴省詞

別酒送君君一醉。清潤潘郎。更是何郎壻。記得釵頭新利市。莫將分付東鄰子。回首
長安佳麗地。三十年前。我是風流帥。為向青樓尋舊事。花枝缺處餘名字。右蝶戀花
詞。在東坡謫黃時。送潘邠老赴省試作也。今集不載。